

UHOLDEAK EUROPA ERDIALDEAN. Bihar Berlinera da joatekoa Romano Prodi Europako Batzordeko burua, Hamabostek urek kalte eginikoei emango dizkieten laguntzez agintari alemaniar, austriar, txekiar eta hungariarrekin mintzatzeko asmoz.



JENS BUETTNER / EPA

Dresdeko Semper opera antzokia, atzo, urak harturik.

Urak Dresde Alemaniako hiri historikoa azpiratu du, Txekian eta Austrian atzera egin arren

Schroeder kantzilerrak «hondamen nazionaltzat» jo du ezbeharra, eta Ekonomia Ministerioak, behin-behinean, ehunka milioi euroko galerak izan direla kalkulatu du

Erredakzioa | **DONOSTIA**

Alemanian azken egunotan gutxienez 14 lagun hil dituzten uholdeek Dresde hiri historikoko eraikin barrokoak ur azpian hartu zituzten atzo, eta milaka lagun etxetik ateratzera behartu. Viena (Austria) eta Pragan (Txekiar Errepublika), berriz, atzo abiatu zituzten bere onera etortzen ari den hondamendiaren ondorioak konpontzeko lanak. Danubio ibaiak daraman ur handia Bratislava (Eslovakia) heldu zen atzo, kalte handirik eragin gabe, eta Budapestera (Hungaria) ailegatzekoa zen gaur.

«Elba ibaiak harturiko maila Dresden inoiz jasotako garaia da», esan zuen atzo hiriko alkate Ingolf Rossberg. Dresdek dituen 480.000 herritarren laurdenak atera zituztela gaineratu zuen Alemania ekialdeko hiriko alkateak, uholdearen mailarik handiena gaurko espero zutela ohartarazi aurretik.

Duela gutxi berrituriko erdialde historikoa ur azpian zen atzo. Suhiltzaileak Semper opera antzokia eta Zwinger jau-regia babesten saiatu ziren, urak ahalegin oro ito zituen arte. «Ez zuten ura nora atera», esan zuen Saxoniako Barne Ministerioako eledunak. Hiriko auzo ugari erabat hutsik zeudela eta hainbat tokitan arpilatze batzuk salatu zituztela gaineratu zuen.

Ibaian beherago den Bitterfeld hiria erabat hustu behar izan zuten larrialdi zerbitzuek eta boluntarioek, hondar zorroz eraikitako hesia urek lehertu ondoren. Magdeburgon, 20.000 lagun atera zituzten, alkateak asteburuan hiria hiru metro ur azpian izango zela ohartarazi zuen.



JAN BAUER / AP

HERRITARRAK HIRITIK KANPO. Uholdeak azpiraturik dagoen Dresdeko auzuneetako bat. Herritarren laurdenak atera zituzten hiritik.



PETER ENDIG / EPA

AUZOLANEAN URAREN AURKA. Boluntarioak eta suhiltzaileak Goitzsche ibaiari hesia jarri nahian, Bitterfeld hirian.